

B3 vo Alsoo zijn Excellentie tot conseruatie ende handthoudinge der gemeenen welvaart, Rechten ende Vrijheden der Nederlanden altyts orbaerlick ende noodich bevonden heeft alle goede vrientschap, eenicheyt ende eendracht onder die Provincien der selver Landen oock drey [= der] steden ende besondere Leden van dien onderhouden te worden, waer duer niet alleenlick de gemeene vyant met meerder ghewelt, gemeene macht, ende onderlinge bystant, weder gestaen ende afgeweert; maer hem oock die middelen benomen soude worden van tusschen die selue Provincien, steden ofte Leden vandien eenich onverstant ofte tweedracht te saeyen of te maken door oorsake soo vande onderscheyt vande Religie als anders. Soo ist dat zijn Excell. gesien hebbende sekere Unie ende verbont tUtrecht, in Januario lestleden gemaect ende besloten, tusschen den welgeboren Heere Graeff Johan van Nassau stadtholder vanden Furstendomme ende Landtschappe van Gelre ende Graeffschappe Zutphen, oock die van Hollandt, Zeelandt, Utrecht, ende der Vriesscher omlanden tusschen die Eems ende Lauwers, die selue Unie ende verbont voor goet heeft bevonden ende toegestaen, doch op dat die selue diest te beter *B4 ro* ende met bequamer oorsake* ende gelegentheyt mochten der generaliteyt der Provincien van herwertsouer voorgestelt worden om tot een algemeene vrede, unie ende eendrachticheyt over die gansche Landen met gemeene ver-

willinge aengenomen ende besloten te worden, heeft tot noch toe wt gestelt ende opgehouden vande selue Unie tonderschrijuen ende alsoo nu syne Hoocheyt met een groot deel der voors. Provincien van herwertsouere verclaert hebben dat sy voor goet insien ende bevynden raetsaem te wesen, dat eene alsodanige Unie soude geraemt, besloten ende aengenomen worden tot beter beleydinge der saken onses gemeene Vaderlants. Soo heeft syn Excell. nu oock wel willen verclaren, als hy mits dese verclaert die voors. Unie also tUtrecht tusscen die voors. Provincien gemaect ende besloten is geweest, voor goet aentenemen ende te houden, also hyse aenneemt ende voor goet hout, als voorseker achtende dat inde selue douerheyt ende dauthoriteyt der Hoocheyt vande Eertshertoge niet vercort noch vermindert en wort, ende also binnen corten dagen de voors. geunieerde haer sullen vergaderen om vorder ouer alle particuliere poincten ende articulen der seluer Unie te ramen ende te besluyten tgene tot meerder ende vaster eendracht der seluer sal mogen dienen. Soo ist dat syn Excell. oock hier mede verclaert te willen de selue articulen ende pointen aen nemen ende achtervolghen also sy vande voors. Provincien van Gelderlandt, Hollandt, Zeelandt, Utrecht, ende andere die haer daer mede sullen begeuen, sullen geraemt, gesloten ende voor goet aengenomen worden. Des toirconde heeft syn Excell. dese met sijnen Naem ondertekent, ende sijn secreet segel daer beneffens laten drucken in placact binnen der stede van Antwerpen opten. 3. dach van Maio, des Jaers 1579. ondertekent Guillaum de Nassau noch leger stont gheschreuen by beuele van syn Excell. ondertekent N. Bruynincx.